

**Bil. 2**

**Rabu**

**13 Mac 2019**



**MALAYSIA**

# **PENYATA RASMI PARLIMEN**

*Parliamentary Debates*

## **KAMAR KHAS**

*Special Chamber*

**PARLIMEN KEEMPAT BELAS  
PENGAL KEDUA  
MESYUARAT PERTAMA**

## KANDUNGAN

### UCAPAN DI BAWAH USUL BERKENAAN PERKARA TADBIR KERAJAAN [P.M.17]:

- **Isu Pemberhentian Pekerja Pembersihan &  
Pengawal Keselamatan Sekolah**  
- *YB. Dato' Sri Dr. Santhara (Segamat)* [Halaman 1]
- **Dakwaan Wang “Dirompak” dari Akaun Bayaran  
Balik kutipan GST (*GST Refund*) milik  
Perbendaharaan Malaysia**  
- *YB. Datuk Seri Ir. Dr. Wee Ka Siong (Ayer Hitam)* [Halaman 5]

**MALAYSIA  
KAMAR KHAS  
PARLIMEN KEEMPAT BELAS  
PENGKAL KEDUA  
MESYUARAT PERTAMA**

**Rabu, 13 Mac 2019**

**Mesyuarat dimulakan pada pukul 2.30 petang**

**DOA**

*[Timbalan Yang di-Pertua (Dato' Mohd Rashid Hasnon)  
mempengerusikan Mesyuarat]*

---

**UCAPAN DI BAWAH USUL  
BERKENAAN PERKARA TADBIR KERAJAAN (P.M. 17)**

**Isu Pemberhentian Pekerja Pembersihan &  
Pengawal Keselamatan Sekolah**

**2.34 ptg.**

**Dato' Sri Dr. Santhara [Segamat]:** Tajuk ucapan, Isu Pemberhentian Pekerja Pembersihan dan Pengawal Sekolah. Tuan Yang di-Pertua, pertama sekali, saya ingin mengucapkan setinggi-tinggi penghargaan kepada pihak Kementerian Pendidikan Malaysia yang sentiasa berusaha untuk membuat yang terbaik untuk memajukan sistem pendidikan negara demi kepentingan rakyat Malaysia dan juga menyumbang kepada pembangunan Malaysia.

Namun begitu, izinkan saya membawa kepada perhatian Tuan Yang di-Pertua mengenai satu masalah baru yang dihadapi oleh pihak pentadbiran sekolah. Banyak aduan telah diterima mengenai pekerja-pekerja pembersihan dan pengawal keselamatan di 19 buah sekolah di sekitar Parlimen Segamat yang telah diberhentikan kerja. Saya percaya situasi yang sama berlaku di kawasan dan daerah lain juga. Antara alasan yang diberikan adalah pengurangan peruntukan dari Kementerian Pendidikan. Saya minta pihak kementerian menjelaskan dengan lebih terperinci rasional di sebalik keputusan untuk mengurangkan peruntukan ini.

Saya juga difahamkan bahawa tender pembersihan kawasan sekolah dan kawalan keselamatan telah kebanyakannya diberikan kepada kontraktor baru. Namun

begitu, saya dimaklumkan oleh pihak PPD bahawa kontraktor baru masih belum lagi menghantar pekerja-pekerja pembersihan dan pengawal keselamatan ke sekolah-sekolah ini yang mengakibatkan kekurangan tenaga kerja.

Untuk makluman Tuan Yang di-Pertua, bagi kapasiti 100 murid, sekurang-kurangnya diperlukan tiga pekerja pembersihan termasuk tukang kebun. Oleh itu, saya minta pihak kementerian menjelaskan mengapa kontraktor baru masih belum lagi menghantar pekerja-pekerja pembersihan dan juga pengawal keselamatan ke sekolah-sekolah ini.

Pemberhentian dan pengurangan jumlah pekerja-pekerja pembersihan dan terutamanya pengawal keselamatan menyebabkan kesulitan kepada pihak sekolah. Sebagai contoh, di SK Methodist Segamat dan beberapa sekolah kurang murid (SKM), hanya satu pengawal keselamatan sahaja yang dikekalkan perkhidmatan. Pengawal ini bertugas dari jam 7 pagi sehingga 7 malam dan tiada pengawal ditugaskan pada waktu malam. Ini menimbulkan risiko keselamatan yang besar untuk sekolah-sekolah tersebut terbabit. Pihak kementerian diminta menjelaskan langkah-langkah yang sedia ada dan yang akan diambil untuk menjamin keselamatan sekolah dan murid memandangkan tiada lagi kawalan waktu malam.

Diminta juga dinyatakan pelan bagaimana pihak kementerian bercadang untuk menambah baik ciri-ciri keselamatan di sekolah kerana adalah tidak adil dan tidak wajar untuk meletakkan pihak sekolah, guru-guru dan murid dalam risiko keselamatan yang tinggi hanya untuk mengurangkan kos.

Aduan lain yang diterima adalah berkenaan gaji pengawal keselamatan yang telah dikurangkan dari RM1,800 sebulan kepada RM1,100 sebulan. Ini merupakan satu tamparan hebat kepada keluarga pengawal-pengawal keselamatan yang kebanyakannya adalah dari kumpulan B40. Apakah langkah yang diambil oleh pihak kementerian untuk membela nasib keluarga pekerja-pekerja ini yang hilang punca pendapatan dan juga yang dikurangkan pendapatan bulanan sebanyak RM700? Adakah pihak kementerian akan memberikan pampasan atau menyediakan sebarang program latihan dan penempatan semula kepada pekerja-pekerja ini yang kebanyakannya telah berkhidmat untuk tempoh yang lama?

Saya amat berharap nasib pekerja-pekerja rendah am ini akan dibela oleh Kementerian Pendidikan di bawah Kerajaan Pakatan Harapan. Sekian, terima kasih.

**2.37 ptg.**

**Timbalan Menteri Pendidikan [Puan Teo Nie Ching]:** Terima kasih Tuan Yang di-Pertua, terima kasih Yang Berhormat Segamat. Tuan Yang di-Pertua, Kementerian Pendidikan Malaysia (KPM) mengucapkan terima kasih kepada Yang Berhormat Segamat terhadap keprihatinan beliau berkaitan pengurusan keselamatan dan kebersihan sekolah-sekolah serta kebajikan pekerja kontrak di bawah kedua-dua perkhidmatan tersebut. Saya berbesar hati untuk menjelaskan perkara-perkara yang dibangkitkan oleh Ahli Yang Berhormat mengenai Pemberhentian Pekerja Pembersihan dan Pengawal Keselamatan Sekolah.

Tuan Yang di-Pertua, pihak kementerian sentiasa memandang serius berkaitan pengurusan sekolah-sekolah di seluruh negara agar institusi ini sentiasa berada pada tahap yang terbaik dalam pembentukan modal insan negara dengan mengoptimumkan sumber serta mengimbangkan keperluan. Justeru, dalam merealisasikan hasrat tersebut, beberapa norma dan dasar sedia ada perlu dikaji dan ditambah baik dari semasa ke semasa. Semakan semula norma perkhidmatan Kebersihan Bangunan dan Kawasan (KBK) dan Perkhidmatan Kawalan Keselamatan (PKK) adalah selaras dengan pelaksanaan *zero-based budgeting*, dengan izin, bertujuan mengoptimumkan sumber kewangan kerajaan tahun 2019.

Sehubungan dengan itu, KPM telah mengambil inisiatif untuk mengkaji semula norma dan skop kontrak perkhidmatan pembersihan dan perkhidmatan kawalan keselamatan ini bagi mengoptimumkan peruntukan perbelanjaan kerajaan tanpa menyetepikan kualiti perkhidmatan yang diberikan. Kajian semula ini juga sesuai dengan usaha berterusan yang dilaksanakan oleh KPM dalam menerapkan nilai-nilai murni seperti menjaga kebersihan dalam kalangan murid sekolah.

Tuan Yang di-Pertua, pengaplikasian norma baharu KBK adalah berasaskan beberapa kriteria iaitu keluasan kawasan, bilangan blok, bilangan aras dan bilangan kubikel tandas berbanding norma terdahulu yang cuma mengambil kira keluasan kawasan dan kapasiti bilangan murid dalam sesebuah sekolah. Namun begitu, pihak KPM juga telah menetapkan bahawa bilangan pekerja minimum bagi setiap sekolah adalah seramai dua orang dan bilangan maksimum sembilan orang bagi semua sekolah kecuali sekolah pendidikan khas. Bagi sekolah pendidikan khas, bilangan maksimum pekerja adalah 11 orang. Kriteria ini juga terpakai bagi semua institusi pendidikan di Malaysia iaitu jumlah pekerja minimum bagi institusi adalah seramai lapan orang dan jumlah pekerja maksimum adalah seramai 38 orang pekerja.

Kajian norma dan skop bagi perkhidmatan kawalan keselamatan bagi sekolah kurang murid (SKM) pula adalah untuk mengoptimumkan kos pengurusan SKM. Hal ini kerana skop dan spesifikasi perkhidmatan PKK bagi sekolah tersebut adalah terhad berdasarkan kepada bilangan murid serta nilai aset kerajaan yang dimiliki oleh kebanyakan SKM adalah lebih rendah berbanding sekolah bukan SKM.

#### ■1440

KPM akan sentiasa berusaha menambah baik norma dan skop perkhidmatan kawalan keselamatan untuk sekolah SKM dari semasa ke semasa. KPM juga sedang mengkaji opsyen-opsyen lain yang bersesuaian sebagai langkah menjamin keselamatan sekolah. Antaranya adalah perbincangan dengan Kementerian Dalam Negeri (KDN) untuk menempatkan anggota RELA di sekolah-sekolah yang akan dikenal pasti oleh KPM dan penggunaan sistem keselamatan melalui kamera litar tertutup (CCTV) dan sistem penggera.

Tuan Yang di-Pertua, pihak kementerian juga telah membuat semakan berhubung dakwaan Ahli Yang Berhormat tentang terdapat kontraktor baharu masih belum menghantar pekerja pembersihan dan pengawal keselamatan. Untuk makluman Ahli Yang Berhormat, kontraktor baharu yang dilantik hanya melibatkan kontrak perkhidmatan kebersihan sahaja dan berdasarkan semakan bersama pihak Pejabat Pendidikan Daerah (PPD) Segamat pada 4 Mac 2019, disahkan bahawa semua kontraktor baharu perkhidmatan kebersihan bangunan dan kawasan ini telah pun menempatkan pekerja-pekerja mereka mulai 1 Januari 2019 seperti mana yang disyaratkan dalam kontrak.

Untuk makluman Ahli Yang Berhormat, sekiranya syarikat yang dilantik gagal melaksanakan obligasi kontrak, syarikat terbabit boleh dikenakan denda mengikut kadar yang ditetapkan di dalam klausa denda. Sekiranya tindakan remedi masih tidak diambil oleh syarikat, kontrak boleh ditamatkan mengikut klausa penamatan yang telah dipersetujui antara syarikat dan juga kerajaan.

Berkenaan gaji pengawal keselamatan yang telah dikurangkan dari RM1,800 sebulan ke RM1,100 sebulan pula, perkara tersebut adalah di luar kawalan pihak kementerian. Perkara tersebut adalah antara syarikat (majikan) dan juga pengawal keselamatan kerana pengawal keselamatan dilantik oleh syarikat keselamatan yang ditawarkan kontrak oleh KPM. Oleh kerana kontrak yang ditandatangani adalah di antara kerajaan dan syarikat yang dilantik, maka kerajaan tidak terikat dengan bayaran pampasan kepada pekerja susulan isu gaji yang dikurangkan dan pemberhentian pekerja tersebut.

Akhir sekali, KPM sekali lagi merakamkan setinggi-tinggi penghargaan kepada Yang Berhormat Segamat yang sangat prihatin berkaitan isu-isu pendidikan khususnya isu yang

dibangkitkan oleh Ahli Yang Berhormat berkaitan pengurusan keselamatan dan kebersihan sekolah-sekolah serta kebajikan pekerja kontrak di bawah kedua-dua perkhidmatan tersebut. Sekian, terima kasih.

**Dakwaan Wang “Dirompak” dari Akaun Bayaran Balik kutipan GST (*GST Refund*)  
milik Perbendaharaan Malaysia**

**2.44 ptg.**

**Datuk Seri Ir. Dr. Wee Ka Siong [Ayer Hitam]:** Tuan Yang di-Pertua, pada 8 Ogos 2018, Yang Berhormat Menteri Kewangan mendakwa di Dewan Rakyat bahawa kerajaan terdahulu telah merompak wang dari akaun “*GST refund*” milik Perbendaharaan Malaysia. Dakwaan ini meresahkan masyarakat Malaysia dan Yang Berhormat Ahli Parlimen Rembau telah membuat laporan polis pada 9 Ogos 2018, agar pihak polis dapat menyiasat kesahihan dakwaan tersebut dan mencari orang yang sepatutnya bertanggungjawab terhadap “rompakan wang” seperti mana yang didakwa oleh Yang Berhormat Menteri Kewangan.

Akan tetapi, setelah enam bulan berlalu, pihak polis, Kementerian Kewangan, Ketua Audit Negara tidak membuat sebarang kenyataan berkaitan status siasatan. Perkara ini melibatkan kepentingan awam yang perlu disegerakan. Ianya perlu disiasat dari sudut perundangan, khususnya dari perspektif jenayah.

Maka, saya ingin mengetahui sejauh manakah siasatan dijalankan oleh pihak polis, berapakah saksi yang telah dipanggil dan adakah pihak berkuasa mengemukakan kertas siasatan (IP) kepada Peguam Negara untuk membuat keputusan dan mengambil tindakan selanjutnya. Adakah jumlah RM19.4 bilion yang dikatakan tidak dikembalikan itu merupakan angka yang sudah disahkan tanpa sebarang keraguan oleh Jabatan Kastam Diraja Malaysia untuk dipulangkan kepada pembayar cukai? Siapa pula yang lebih berkuasa di dalam Kementerian Kewangan yang merompak wang tersebut serta enggan memulangkannya kepada pembayar cukai. Rakyat sedang menanti jawapan ini, sekiranya dakwaan Yang Berhormat Menteri Kewangan ini benar.

Sekiranya siasatan mendapati individu tertentu terlibat dalam penyelewengan, kenapa mereka tidak dihadapkan ke mahkamah? Sementara itu, sekiranya hasil siasatan mendapati dakwaan Yang Berhormat Menteri Kewangan tidak berasas, apa pula pendirian kerajaan terhadap dakwaan yang tidak berasas ini. Ini soal integriti. Sekiranya ada unsur penyalahgunaan kuasa, sesiapa yang terlibat perlu dihadapkan ke muka pengadilan. Sebaliknya, jika aduan atau dakwaan tidak berasas telah dibuat di dalam Dewan Rakyat,

maka tindakan setimpal juga harus dikenakan terhadap individu tersebut. Sekian, terima kasih.

**2.46 ptg.**

**Timbalan Menteri Kewangan [Dato' Haji Amiruddin bin Hamzah]:** Terima kasih Tuan Yang di-Pertua, terima kasih Yang Berhormat Ayer Hitam yang mengemukakan soalan. Tuan Yang di-Pertua, jumlah tunggakan bayaran balik GST sebanyak RM19.4 bilion seperti yang diumumkan adalah merupakan jumlah tunggakan sehingga 31 Mei 2018 dan ianya telah disahkan oleh Jabatan Kastam Diraja Malaysia pada bulan Ogos 2018 sebagai amaun yang telah melalui pelbagai proses verifikasi, tapisan dan semakan dalaman. Hanya wang yang tidak mencukupi dalam Tabung Amanah Bayaran Balik GST yang menyebabkan langkah terakhir pembayaran tidak dapat dilaksanakan.

Semua tunggakan bayaran balik GST akan dibayar balik sepenuhnya seperti mana yang telah diumumkan tertakluk kepada tuntutan yang dibuat oleh syarikat adalah teratur dan mengikut peraturan semasa yang ditetapkan. Siasatan berhubung bayaran balik GST sedang dijalankan oleh Jawatankuasa Kira-kira Wang Negara (PAC). Laporan hasil siasatan akan dibentang di Parlimen setelah ianya dimuktamadkan. Sekian, terima kasih.

**Timbalan Yang di-Pertua [Dato' Mohd Rashid Hasnon]:** Terima kasih Yang Berhormat Timbalan Menteri. Ahli-ahli Yang Berhormat, Mesyuarat Kamar Khas hari ini ditangguhkan sehingga jam 2.30 petang, hari Khamis, 14 Mac 2019.

***[Kamar Khas ditangguhkan pada pukul 2.48 petang]***